

Memorandwm Esboniadol ar gyfer Gorchymyn Senedd Cymru (Breinlythyrau a Phroclamsiynau) 2021

Lluniwyd y Memorandwm Esboniadol hwn gan Swyddfa'r Prif Weinidog ac fe'i gosodir gerbron Senedd Cymru ar y cyd â'r is-ddeddfwriaeth uchod ac yn unol â Rheol Sefydlog 27.1

Datganiad y Gweinidog

Yn fy marn i, mae'r Memorandwm Esboniadol hwn yn rhoi darlun teg a rhesymol o effaith ddisgwyliedig Gorchymyn Senedd Cymru (Breinlythyrau a Phroclamsiynau) 2021

Mark Drakeford AS
Prif Weinidog Cymru
11 Chwefror 2021

RHAN 1

Disgrifiad

1. Mae Gorchymyn Senedd Cymru (Breinlythyrau a Phroclamsiynau) 2021 yn ymwneud â'r Breinlythyrau sy'n rhoi Cydsyniad Ei Mawrhydi i Fil a basiwyd gan Senedd Cymru. Mae'r Gorchymyn yn bwriadu diwygio enw'r Senedd i gyd-fynd â Deddf Senedd ac Etholiadau (Cymru) 2020 yn ogystal â diwygio y sawl sy'n gyfrifol am gyflwyno Biliau i gael y Cydsyniad Brenhinol. Mae hefyd yn cynnwys geiriad y proclamsiynau brenhinol sy'n berthnasol i swyddogaethau'r Llywydd o dan adrannau 4 a 5 o Ddeddf Llywodraeth Cymru 2006, fel y'i diwygiwyd gan Ddeddf Cymru 2017.

Materion o ddiddordeb arbennig i'r Pwyllgor Deddfwriaeth, Cyfiawnder a'r Cyfansoddiad

2. Dim

Y cefndir deddfwriaethol

3. Mae Adran 116 o Ddeddf Llywodraeth Cymru 2006¹ yn cyfeirio at y "Letters Patent" sy'n golygu'r Breinlythyrau a lofnodwyd gan Ei Mawrhydi â'i llaw Ei hunan i ddangos Ei Chydsyniad i Fil a basiwyd gan Senedd Cymru yn ogystal â'r holl broclamsiynau brenhinol o dan adrannau 4(2) a 5(2) o Ddeddf Llywodraeth Cymru 2006, sydd wedi eu pasio o dan y Sêl Gymreig.
4. Caiff gorchymynion a wneir o dan yr adran hon eu gwneud gan y Frenhines yn y Cyfrin Gyngor ac wedi hynny maent yn ddarostyngedig i'r weithdrefn negyddol yn y Senedd.
5. Gwnaed y Gorchymyn hwn gan Ei Mawrhydi yn y Cyfrin Gyngor ar 10 Chwefror 2021.
6. Daw'r Gorchymyn i rym ar 4 Mawrth 2021.

Diben y ddeddfwriaeth a'r effaith y bwriedir iddi ei chael

7. Mae Adran 116 o Ddeddf Llywodraeth Cymru 2006 yn darparu y gall Ei Mawrhydi, trwy Orchymyn yn y Cyfrin Gyngor, wneud darpariaeth ar gyfer ffurf a'r modd o lunio a chyhoeddi breintlythyrau a phroclamsiynau.
8. Nid yw Gorchymyn Cynulliad Cenedlaethol Cymru (Breinlythyrau) 2011 a wnaed yn flaenorol o dan yr adran hon yn adlewyrchu'r ddeddfwriaeth bresennol o ganlyniad i ddiwygiadau a wnaed i Ddeddf Llywodraeth Cymru 2006 gan Ddeddf Cymru 2017 a Deddf Senedd ac Etholiadau (Cymru) 2020.

¹ <https://www.legislation.gov.uk/cy/ukpga/2006/32/section/116>

9. Bydd Gorchymyn Senedd Cymru (Breinlythyrau a Phroclamsiynau) 2021 yn dirymu ac yn disodli Gorchymyn Cynulliad Cenedlaethol Cymru (Breinlythyrau) 2011.
10. Diben y Gorchymyn hwn felly yw:
- Ymdrin â'r newid enw yn Neddf Senedd ac Etholiadau (Cymru) o Gynulliad Cenedlaethol Cymru i Senedd Cymru, a
 - Darparu ar gyfer ffurf y geiriau i'w defnyddio ar gyfer proclamsiynau brenhinol o dan aa.4(2) a 5(2), a basiwyd o dan y Sêl Gymreig. Mae hwn yn ofyniad newydd, a fewnosodwyd gan Ddeddf Cymru 2017, sy'n berthnasol i swyddogaethau'r Llywydd o dan aa.4² a 5³ o Ddeddf Llywodraeth Cymru 2006, mewn perthynas â chynnal y bleidlais ar gyfer etholiadau'r Senedd ar ddiwrnodau ar wahân i'r hyn a bennir yn adran 3 o'r Ddeddf honno.
11. Mae'r Gorchymyn hefyd yn cydnabod y newid a wnaed i'r weithdrefn ar gyfer cyflwyno Biliau i gael y Cydsyniad Brenhinol a wnaed gan Ddeddf Cymru 2017. Yn flaenorol, cyfrifoldeb Clercod y Senedd oedd gwneud hyn ond y Llywydd⁴ fydd yn gyfrifol am hynny yn awr.

Ymgynghori

12. Daeth y diwygiadau deddfwriaethol gofynnol y mae Gorchymyn Senedd Cymru (Breinlythyrau a Phroclamsiynau) 2021 yn ymdrin â hwy i effaith yn Neddf Senedd ac Etholiadau (Cymru) 2020 a Deddf Cymru 2017.
13. O ganlyniad, ystyriwyd nad oedd angen ymgynghori er mwyn gwneud y Gorchymyn hwn.

Asesiad Effaith Rheoleiddiol

14. Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Gorchymyn hwn. O ganlyniad, ystyriwyd nad oedd yn angenrheidiol cynnal asesiad effaith rheoleiddiol o gostau a manteision tebygol cydymffurfio â'r Gorchymyn gan fod Gorchymyn Senedd Cymru (Breinlythyrau a Phroclamsiynau) 2021 yn dod o fewn yr eithriad a geir yn y Cod lle mae angen diwygiadau technegol neu ddiwygiadau ffeithiol rheolaidd i ddiweddarau rheoliadau.
15. Nid yw'r Gorchymyn hwn yn cael unrhyw effaith ar ddyletswyddau statudol Gweinidogion Cymru sy'n ymwneud â chyfle cyfartal (adran 77 o Ddeddf Llywodraeth Cymru 2006), yr iaith Gymraeg (adran 78 o Ddeddf Llywodraeth Cymru 2006), na datblygu cynaliadwy (adran 79 o Ddeddf Llywodraeth Cymru 2006), ac ni fydd yn cael unrhyw effaith ar lywodraeth

² <https://www.legislation.gov.uk/cy/ukpga/2006/32/section/4>

³ <https://www.legislation.gov.uk/cy/ukpga/2006/32/section/5>

⁴ Adran 115(1) o Ddeddf Llywodraeth Cymru 2006 fel y'i diwygiwyd gan Ddeddf Cymru 2017

leol, y sector gwirfoddol na chynlluniau busnes o dan adran 73, 74 a 75 o Ddeddf Llywodraeth Cymru 2006 yn y drefn honno.